

四庫全書

史部

欽定四庫全書

欽定續通典卷九十九

兵

避銳

五代梁遣王景仁擊趙晉遣周德威救之景仁所將皆
梁精兵晉軍望之色動德威告莊宗曰梁兵銳未可與
爭宜少退以待之莊宗未決已而獲梁謀者知梁軍果
將渡河莊宗如其策乃退軍鄆邑誘破梁軍

周太祖因劉旻攻晉州遣王峻為行營都部署將兵討之別遣陳思讓康延釗自烏嶺出絳州與峻會峻至陝州留不進太祖遣使者翟守素馳至陝州諭峻欲親征峻屏左右謂守素曰晉州城堅不可近而劉旻兵銳亦未可當臣所以留此者非怯也蓋有待爾守素馳還具道峻言是時太祖已下詔西幸聞峻語乃止不行

元趙天錫以元帥左都監兼冠氏令宋將彭義斌據大名冠氏元帥李全降之人心頗搖天錫令衆姑少避其

鋒以圖後舉乃帥將佐往依大將博里哈軍未幾破義斌於真定

堅壁持久候隙破之

唐李光弼以朔方兵五千救常山常山團結兵執賊將史思義降時史思明攻饒陽李光弼問計於思義答曰今軍行疲勞逢敵不支不如按軍入守料勝而出賊兵方銳持重圖之為萬全光弼善之會饒陽賊五千至九門思明恃有援解鞍休士光弼諜知之提輕兵斂旗鼓

伺賊方飯襲殺之且盡思明懼引去

五代時晉攻魏魏人求救於梁太祖遣侯言救魏言築壘於洹水太祖怒言不出戰遣葛從周代言從周至軍益閉壘不出而鑿三閘門以待晉兵攻之從周以精兵自閘門出擊敗晉軍

金太祖收國初遼主自將七十萬至特們駙馬蕭特默等將騎五萬步四十萬至沃稜濤帝自將禦之行次約羅會諸將議皆曰遼兵號七十萬其鋒未易當吾軍遠

來人馬疲乏宜駐於此深溝高壘以待帝從之遣都古
嚕訥尼楚赫鎮達嚕古帝以騎兵親候遼軍獲督餉者
知遼主以卓努叛西還二日矣是日帝還至舒吉灤有
光見于矛端諸將曰今遼主既還可乘其怠追擊之帝
曰誠欲追敵約齎以往無事餽饋若破敵何求不得衆
皆奮躍追及遼主於呼卜塔岡遼兵大潰金師馳之橫
出其中遼師敗績

元順帝至正時徽饒賊寇於潛以董搏霄參知政事將

兵討破之遂復其縣治既而賊兵大至焚倚郭廬舍搏
霄按軍不動左右請出兵搏霄曰未也遣人執白旗登
山望賊約曰賊以我為怯必少懈伺其有間則麾所執
旗又伏兵城外皆授以火礮復約曰見旗動礮即發已
而旗動礮發兵乃盡出斬首數千級

堅壁挫銳

唐劉蘭為夏州都督府司馬貞觀初梁師都以突厥兵
頻於城下蘭偃旗卧鼓不與爭鋒賊疑不敢迫夜引去

蘭追擊破之

宋魏勝守海州金兵逼關勝登關門張樂飲酒犒軍士
令固守勿出戰金攻之踰時乃少遣士出憑險隘擊之
金知不可攻將轉而渡河襲關後勝斂兵入城金軍徑
趨關更欲過砂堰圍城為營勝先已據堰備之金軍不
得過

元李璫陰結宋人以益都叛據濟南詔親王噶必齊總
兵討之賊勢甚盛繼命史天澤往天澤聞璫入濟南笑

曰豕突入豈無能為也至則進說於噶必齊曰瑣多謫而兵不精不宜力角當以歲月斃之乃深溝高壘絕其奔軼凡四月城中食盡軍潰出降

不戰挫銳

五代初楊行密取楚州孫儒率衆攻之行密將田頔劉威等遇之輒敗行密欲走銅官其客戴友規曰儒來氣銳而兵多蓋其鋒不可當而可以挫其衆不可敵而可久以敝之若避而走是就擒也劉威亦曰背城堅柵可

以不戰疲之行密以為然久之儒兵飢又大疫行密悉
兵擊之儒敗被擒

宋馮讚知梓州時劍外初平讚視事纔數日偽軍校上
官進嘯聚士卒三千餘衆劫村民數萬人夜攻州城讚
曰賊垂夜奄至此烏合之衆以箠相撻擊必無固志
可持重以鎮之待旦自潰矣躬自率衆巡城密令促其
更籌未夜分擊五鼓賊悉遁去因追之擒進斬於市郡
境以安

元刷從太祖征柰曼敵率銳兵鼓而進刷按兵此不動敵止俄復鼓而進刷亦不動敵卒疑畏不敢前又鞏昌部長和托叛民大擾汪惟正謂將吏曰和托今若獬犬方肆狂齧苟一戰不利則城邑為墟當勝以不戰乃發兵踵之賊欲戰不得休則撓之若是者兩月知其糧盡勢蹙曰可矣與戰屢捷

敵飢以持久敝之

唐河間王孝恭討輔公柘賊將馮惠亮等據險邀戰孝

恭堅壁不出遣奇兵絕糧道賊飢夜薄營孝恭卧不動
明日使羸兵扣賊壘挑之別令將盧祖尚選精騎以待
俄而兵却賊追北且囂遇祖尚軍薄戰遂大敗公祐窮
棄丹陽走擒之江南平

五代漢隱帝遣樞密使郭威討李守貞威用馮道計謀
以遲久困之乃與諸將分為三柵發五縣丁夫築連壘
以護三柵守貞出兵壞連壘威輒補其所壞守貞輒出
爭之每出必有亡失如此逾年守貞城中兵食俱盡殺

人而食威曰可矣乃為期日督兵四面攻而破之守貞自焚死

宋韓世忠敗金人於大儀時達喇屯泗州烏珠屯竹塾鎮為世忠所扼會雨雪金饋道不通野無所掠殺馬而食番漢軍皆怨烏珠夜引軍還餘衆棄輜重遁

因敵飢乘其敝而取之

唐邱行恭於大業末聚兵萬人保郿城百姓多附之時原州賊圍扶風太守竇璡堅守經數月賊食盡無所掠

衆稍散歸行恭行恭因遣諭諸賊共迎義軍乃自率五百人負米麥持牛酒詣賊營賊帥長揖行恭斬之謂其衆曰若皆豪傑也何為事賊衆皆俯伏曰願改事公行恭率其衆迎謁太宗於渭北

因敵三鼓致衰敗之

元張宏範率千人戍萬山既城與將士校射東門宋師奄至咸謂衆寡不敵宜入守宏範戒曰退者斬遣李庭當其前他將攻其後親率二百騎為長陣令曰聞鼓則

欽定四庫全書

劉定四庫全書
卷九十九

進未鼓勿動宋步騎相間突陣宏範軍不動再進再却
宏範曰彼氣衰矣鼓之前後奮擊宋師奔潰

致敵力疲夾攻敗之

唐郭子儀李光弼敗賊將史思明於沙河遂趨常陽祿
山聞思明敗益以精兵子儀堅壁自固賊來則守賊去
則追晝揚其兵夜襲其幕賊人不得休息數日子儀謂
光弼曰賊怠矣可以戰戰於嘉山斬馘四萬級

宋畢再遇守六合金將赫舍哩攻之不克乃益增兵至

環城亘三十里再遇令臨門作樂以示閒暇而間出奇兵擊之敵晝夜不得休乃引退再遇料其且復來乃自提兵奪城東野新橋出敵之背金人遂遁去

遼太宗伐晉晉兵駐澶淵其前軍高行周在戚城乃命趙延壽延昭以數萬騎出行周右帝以精兵出其左戰至暮帝復以勁騎突其中軍晉軍不能戰會有謀者言晉軍東面數少沿河城柵不固乃急擊其東偏衆皆奔潰縱兵追及遂大敗之又統和時宋將曹彬米信取涿

州陷固安耶律休格擊走之月餘復至休格以輕兵薄之伺蓐食擊其離伍單出者且戰且却南軍自救不暇結方陣塹地兩邊而行軍渴乏井漉淖而飲凡四日始達於涿會太后軍至冒雨而遁太后以銳卒追及之彬信力窮環糧軍自衛休格圍之彬信以數騎亡歸餘衆悉潰

金章宗泰和六年宋將皇甫斌分路侵蔡阻溱水不敢進於是平章布薩揆遣完顏薩布及布色鄂諾完顏達

希布等以騎七千往擊之會溱水漲宋兵扼橋以拒薩
布等謀潛師夜出達希布以騎涉水出其右鄂諾出其
左薩布度其軍渡乃率副統阿魯岱以精兵直趨橋宋
兵不能過比明大潰鄂諾以兵斷真陽路諸軍追擊至
陳澤斬首二萬級

元托壘攻鄧州不下遂將而北金將哈達等知托壘已
北合步騎十五萬躡其後托壘按兵遣其將呼圖克等
誘之且旦暮命軍中曰毋令彼得休息宜夜鼓譟以擾

之太宗時亦渡河遣親王扣肯布哈等將萬餘騎來會
遂奮擊大破之追奔數十里

明李文忠援大同次馬邑敗元游兵進至白楊門天雨
雪已駐營文忠令移前五里阻水自固元兵乘夜來劫
文忠堅壁不動質明敵大至以二營委之殊死戰度敵
疲乃出精兵左右擊大破之追至蒙克倉而還

陣久疲致敗

五代梁晉戰胡柳晉軍敗莊宗欲收兵還臨濮李嗣昭

曰梁軍已勝旦暮思歸吾若收軍使彼休息整而復出
何以當之宜以精騎撓之因其勞乏可以勝也王建及
亦曰敵衆晡晚大半思歸擊此疲敗之卒易如拉朽時
日已暮建及大呼入陣李嗣昭繼之梁軍大敗

周世宗既敗北漢兵于高平乘勝而進圍城之役諸將
議不一故久無成功世宗欲解去而未決聞史彥超戰
死遽班師倉卒之際亡失甚衆

出其不意

唐張巡守雍邱令狐潮引賊衆四萬至城下巡曰賊兵精銳且知城中虛實有輕我心今出其不意擊之彼必驚潰賊勢少折然後城可守也乃分千人乘城以數隊開門突出巡身先士卒直衝賊陣人馬辟易賊遂退又李晟為鳳翔節度使以吐蕃侵軼遣將王似夜襲賊營率驍勇三千入汧陽城戒之曰賊大衆當過城下慎無擊其首尾首尾雖敗其中軍力全若合勢攻汝必受其弊但俟其前軍已過見五方旗虎豹衣則其中軍也突

其不意可建奇功似如言出擊之賊衆果敗又李愬將
攻吳房諸將曰今日往亡愬曰吾兵少不足戰宜出其
不意彼以往亡不吾虞可擊也遂往克其外城而還

五代初義成軍亂遂安師儒師儒奔梁太祖遣朱珍以
兵趨滑州道遇大雪珍趣兵疾馳一夕至城下遂乘其
城義成軍以為方雪不意梁兵來不為備遂下之又秦
宗權遣盧瑋張晳等攻梁是時梁兵尚少數為宗權所
困太祖乃拜珍淄州刺史募兵於淄青得兵萬餘以歸

欽定四庫全書

劉宋書卷九十九

太祖喜曰賊方息兵養勇度吾兵少而未知珍來謂吾
不過堅守而已宜出其不意擊之乃出擊敗晁等宗權
由此敗亡又唐莊宗初襲位會梁兵攻潞州築夾寨聞
晉王李克用已死以為援兵不能復來遂歸洛陽停斥
候莊宗與諸將謀曰敵所憚者先王耳聞吾新立以為
童子未閑軍旅必有驕怠之心若簡精兵倍道趨之出
其不意破之必矣乃大閱士卒發大原軍伏兵三垂岡
詰旦大霧進兵直抵夾寨梁軍不意晉兵之至將士尚

未起軍中驚擾晉兵燒寨鼓譟而入梁兵大潰失亡將校士卒以萬計又李繼韜以潞州叛降梁莊宗有憂色召李嗣源帳中謂曰繼韜以上黨降梁而梁方急攻澤州吾出不意攻其鄆州以斷梁右臂可乎嗣源對曰夾河之兵久矣苟非出奇則大計不決臣請獨當之乃以步騎五千涉濟至鄆州鄆人無備遂襲破之又明宗以康福帥靈武靈武深入敵境為帥者多遇害明宗乃令將軍牛知柔以兵衛福行至方渠吐蕃果出邀福福以

兵擊走之至青岡峽遇雪福登山望見川谷中煙火有吐蕃數千帳不覺福之至福分其兵為三道出其不意襲之吐蕃大駭棄車帳而走追擊敗之

晉彰國軍節度使張彥澤與契丹戰於陽城為契丹所圍而軍中無水鑿井輒壞又大風契丹順風揚塵奮擊甚銳軍中大懼彥澤以聞諸將諸將皆曰今敵乘上風而吾居其下宜待風回乃可戰彥澤以為然諸將皆去偏將樂元福獨留謂彥澤曰今軍中飢渴已甚若待

風回吾屬為俘矣且逆風而戰敵人謂我必不能所謂
出其不意彥澤即拔拒馬力戰契丹奔北二十餘里追
至衛村又大敗之

宋韓世忠平閩寇旋師永嘉若將休息者忽由處信徑
至豫章連營江濱數十里羣賊不虞其至大震驚遣人
招之賊首曹成以其衆降得戰士八萬又宗澤既敗金
人于衛南渡更策其乘敗來襲乃暮徙其軍金人夜至
得空營益驚憚澤不敢復出兵澤出其不意遣兵過大

河襲擊敗之

金固英以本部破宋五萬人遂奪新又口宗弼留兵守之是夜大雪道路皆冰和尚原宋兵勢重不可徑取宗弼用固英策入自傍近高山叢薄翳薈間出其不意遂取和尚原

元穆呼哩攻真定遣史天祥諭武仙降之乃引兵屯邢西遙水山下仙兄貴以萬人壁於山上負固不下天祥攜完顏呼遜濟哈軍百人由烏道扳援而上盡掩捕之

仙驚曰公若有羽翼者不然何其能也遂下邢磁相三
州又巴延統兵船由淪河入江攻宋陽邏堡三日不克乃
密令阿珠夜以鐵騎三千泛舟直趨上流為搥虛之計
分遣阿爾哈雅等先以步騎攻堡夏貴來援阿珠出其
不意率軍沂流西上四十里泊青山磯冒雪趨沙洲載
馬後隨登岸擒其守將高邦顯遣報巴延巴延急揮諸
將破堡宋兵大潰又張宏範襲宋以其弟宏正為先鋒
攻三江寨寨據隘乘高不可近因連兵向之寨中持滿

以待宏範下令下馬治朝食若將持久者持滿者疑不敢動而他寨不虞也忽麾軍連拔數寨回擣三江盡拔之又何伯祥從察罕伐宋屢捷諸軍入宋境察罕自他道遽還諸軍倉皇失措伯祥曰此必為敵所遏不若出其不意而遂深入其地彼不我測乃可出也遂帥兵突戰直抵司空寨疏布營壘陵高伐木為攻取勢既夜命為五營營火十炬伏精銳於營側險要之地天明令士卒速行而鳴鼓其後宋兵果來追伏發驚潰追擊大破

之又李穀攻成都由廣元出葭萌度木瓜坡蜀人聞穀
至潛伏以待穀諜知之令衆銜枚疾進出其不意賊兵
敗走長驅至成都破之

明湯和傅友德伐蜀太祖諭友德蜀人必悉精銳東守
瞿塘北阻金牛以抗我師若出其意外直擣階文門戶
既隳腹心自潰兵貴神速但患不勇耳友德奉命遂克
成都又吳禎從湯和討方國珍乘潮入曹娥江毀壩通
道出不意直抵軍廐國珍遁入海追及之盤嶼合戰敗

之盡獲其戰艦士卒輜重國珍降

擊其不備

唐高祖武德時吐谷渾寇邊遣柴紹討之敵乘高射紹矢下如雨紹遣人彈琵琶二女子對舞敵怪之相與聚觀紹察其無備潛遣精騎出敵陣後擊之敵衆大潰又張巡守睢陽賊尹子琦圍之不能克乃濟師巡夜鳴鼓嚴隊若將出賊申警俄息鼓賊覘城上兵休乃弛備巡使南霁雲等開門徑抵子琦所斬將拔旗有番將被甲

引千騎麾幟乘城招巡巡陰絕勇士隍中持鉤陌刀强弩約曰聞鼓而奮敵恃衆不備城上譟伏發擒之弩注矢外向救兵不能前俄而縋士復登陴賊皆愕眙乃按甲不出

五代唐莊宗遣李嗣源襲鄆州高行周為前軍會日暮陰雨人無進志行周曰此天贊也彼必無備是夜涉河至城下鄆人不知李從珂先登啟關納外兵旦拔牙城又魏王繼岌伐蜀蜀道阻險議者謂宜緩師待變而進

招討使郭崇韜以決於都統判官李愚愚曰王衍荒怠亂國之政民人厭之乘其倉卒擊其無備其利在速不可緩也崇韜以為然所至迎降遂滅蜀

周李謙溥知隰州并人來圍其城議者皆請速救楊廷璋曰隰州壁壘甚固敵人奄至未能為攻城具當出奇以破之乃募敢死士七百人許以重賞使人與謙溥潛為之期既至則果不為備遂與城中相應銜枚夜擊并人驚潰遂北數十里斬首萬級獲鎧甲萬計

宋王德討信州賊王念經次饒州會賊劉文舜圍城德引兵赴之文舜降謂諸校曰念經聞吾宿留必不為備倍道而趨一鼓擒之

遼末帝乾統元年以蕭多喇久練邊事為西北路招討使北準布尼都格爾率鄰部來侵多喇逆擊追奔數十里乘尼都格爾無備以輕騎襲之獲馬五千足牛羊稱是金布薩忠義以平章政事兼都元帥討契丹師將發敵聲言乞降圖克坦克寧曰敵初困蹙且無降意所以

揚言者是欲緩吾師期也不若攻其未備敵若挫衄則其降必速如其不降乘其怠而急擊之可一戰而定也忠義以為然乃與克寧出中路遂敗之

元史樞從憲宗伐宋師次苦竹厓前阻絕澗深數百尺宋人恃險而不備帝使樞偵之樞率健卒數十縋而下得所致師處以聞帝趣樞急取之宋人懼乃降又憲宗西征丞相史天澤選諸道兵之驍勇者為先鋒命李進為總把道由陳倉入興元度米倉關其地荒塞不通進

伐木開道七百餘里至定遠七星關其關上下皆築連堡宋以五百人守之巴渠江水環堡東流天澤命進往關說降之不從進潛視間道歸白天澤曰彼可取也是夜二鼓天澤遣進率勇士七十人掩其不備攻之脫門樞而入者二十人守門者覺拔刀拒之懸門俄閉諸軍不得入進與二十人力戰殺傷三十人後兵走上堡進乃毀懸門納諸軍追至上堡殺傷益衆宋兵不能敵棄走進遂得其堡守之關路以通

明成祖聞耿炳文率衆三十萬至真定乃躬擐甲胄帥師至鄭州令衆秣馬蓐食渡白溝河謂今夕中秋彼必不備飲酒為樂此可破也夜半至雄縣破其城斬守將楊松又王守仁既討破橫水賊謝志山泃頭賊池仲容遣弟仲安來歸守仁佯許之而陰集兵以待遂下令散兵會歲首大張燈樂仲容信且疑守仁賜以節物誘入謝仲容率九十三人營教場而自以數人入謁守仁呵之曰若皆吾民屯於外疑我乎悉引入祥符宮厚飲食

之賊大喜過望益自安守仁留仲容觀燈時正月三日
大享伏甲士於門諸賊入以次悉擒戮之自將抵賊巢
破上中下三泃斬馘二千有奇泃頭平又劉顯總四川
兵攻把都蠻於凌霄峰賊黨阿二方三等上九絲山顯
計蠻中九日必醉飲乘夜冒雨攀蘿腰絙扳挽而上兵
入蠻帳二賊驚起拒鬪互擊蹈藉投崖者無算二賊奔
逸

攻其不整

唐伊慎刺蘄州充江南西道節度都知兵馬建中末德宗在梁洋鹽鐵使包佶以金幣沂江進獻次蘄口時李希烈已屠汴州遣將杜少誠將兵寇蘄黃以絕江道慎兵遇於永安戍列樹三柵相去纔數里偃旗卧鼓於中柵少誠至分兵圍之軍伍未定中柵聲鼓三柵悉兵以擊賊軍大亂少誠脫身免江路遂通

宋太祖征太原時節度使何繼筠把石嶺關契丹來援繼筠率數千騎禦之敵至乘其未戍列遽麾兵擊之敵

衆大潰追奔數十里又岳飛從劉浩解東京圍與敵相持于滑南領百騎習兵河上敵猝至飛麾其徒曰敵雖衆未知吾虛實當及其未定擊之乃獨馳迎敵斬其梟將遂大敗之

金鄂勒博從宗望伐宋師自大名濟河鄂勒博屯于洛州之境時宋兵來攻鄂勒博乘夜以騎二百潛出其後反擊敗之居數日敵復來蘓統制以兵二萬先至鄂勒博乘其未集以三百騎出戰大敗其衆生擒蘓統制殺

之又羅索等追遼主至白水濼遂與棟摩攻破西京時
夏人救遼兵次天德羅索使塔納布克丹以騎二百為
候兵夏人敗之額圖琿復以二百騎往遇伏兵亦敗時
久雨諸將欲且休息羅索曰彼再破吾騎兵我若不復
往彼將以我怯即來攻我矣乃選千騎往將至野登高
望之夏人恃衆而不整方濟水為陣羅索分軍為二迭
出迭入進退轉戰三十里過宜水烏嚕軍亦至合擊敗
之

元滿濟勒台討叛王海都都勒幹既與之遇方約戰行
伍未定單騎突入陣中往復數四敵兵大擾一戰遂大
捷又大德中叛王圖們烏魯斯等犯邊宗古嚕迎敵于
庫克之地及其未陣直前搏之敵不敢支追之踰金山
乃還又隆興之分寧叛行省檄石安琬討之賊背山而
陣安琬引兵出陣後賊驚潰退而距守安琬揮兵直抵
壘門賊揚言曰願少整行伍而戰死且不憾安琬佯許
之賊果出陣安琬突陣而入大呼曰吾止誅賊首庸卒

非我敵也手刃賊背生擒之

明張輔討安南追賊於富良江賊悉衆拒戰聯舟十餘里橫亘江中而用小船載木立柵以拒官軍輔乘柵未備督將士力戰賊不能支黎季犛父子遁走諸僞將相俱赴軍門降安南平

先設備而勝

唐高崇文統神策軍討劉闢崇文在長武城練卒五千人常若寇至及中使至知時宣命辰時出師兵仗軍需

無不備具後擒闢送京師

宋趙方每令諸將飲酒勿至醉治兵待寇常使日日可戰故淮蜀沿邊雖屢遭金兵而京西一境獨全又孟珙制置夔路元兵謀大舉臨江珙策必道施黔以達湖湘請衆十萬分兵屯峽歸松滋為聲援元兵自隨臨江珙密遣將拒敵更遣兵屯施州元師數十萬入蜀珙增置營砦分布戰艦條上流備禦元人知有備不果入

遼太祖時埒克之亂欲乘我不備為掩襲計給降太祖

將納之命魯庫耶律雲嚴號令勒士卒控轡以防其變
逆黨知有備懼而遁

金熙宗天眷二年宋將岳飛以兵十萬圍邳州甚急城
中兵纔千餘守將懼遣人求救于鎮國上將軍瑄都瑄
都曰為我語守將我嘗至下邳城中西南隅有塹深丈
餘可速實之守將如其教填之岳飛果自此穴地以入
知有備遂止瑄都舉兵以為聲援飛乃退又明昌時珠卜
復叛丞相襄出屯北京會羣牧契丹德壽托蘓等據信

州叛衆號數十萬遠近震駭襄間暇如平日人心乃安
初襄之出鎮也至石門鎮密謂僚屬曰北部犯塞奚足
慮第恐姦人乘隙而動北京近地軍少當預為之備即
遣官發上京等軍六千至是果得其用又宣宗興定四
年夏人攻鞏州持嘉喀齊喀遣兵擊走之生擒夏將劉
達爾嘉允等訊知夏大將尼舒鼎鄂特明二人謀以為
鞏帥府所在鞏既下則臨洮積石河洮諸城不攻自破
故先及鞏且構宋統制程信等將兵四萬來攻喀齊喀

聞之飭兵嚴備俄而兵果至喀齊喀督兵搏戰却之殺數千人攻益急將士殊死戰殺傷者以萬計夏人焚其攻具拔柵而去喀齊喀已先伏甲要地邀之復率衆躡其後斬首甚衆

元世祖中統三年李璫叛據濟南史樞從史天澤往討之城西南有大澗亘歷山樞一軍獨當其險夾澗而城豎木柵于澗中淫雨暴漲木柵盡壞樞曰賊乘吾隙俟夜必出命作葦炬數百置城上逮三鼓賊果至飛炬擲

之風怒火烈弓弩齊發賊衆大潰又張柔伐宋壁於黃
州西北隅有乘舟出者柔曰此偵伺我者也夜必襲吾
不備乃分軍為三以待之二鼓時宋師果至柔遮擊之
俘數百人溺死者不可勝計又成宗大德二年秋諸王
將帥共議防邊咸曰敵往歲不冬出且可休兵於境庫
爾濟蘓曰不然今秋候騎來者甚少所謂驚鳥將擊必
匿其形備不可緩也衆不以為然庫爾濟蘓獨嚴兵以
待之是冬敵兵果大至三戰三克又劉福通陷汴梁號

召羣盜察罕特穆爾北塞太行守鞏洛自將中軍軍
汧池會叛將周全棄鞏懷入汧梁合兵攻洛陽察罕特
穆爾下令嚴守備別以奇兵出宜陽而自將精騎發新
安來援賊至城下見堅壁不可動退去因追至虎牢塞
成臯諸險而還

明湯和守常州凡十年防禦周密寇來輒破走之與吳
良守江陰耿炳文守長興氣勢聯絡屹為東藩保障又
楊銳守備安慶先是林俊策宸濠必反密謀於同知林

有祿修濠城池銳策其必攻皖預設鈎距於江側禁勿
泄至是宸濠起兵果至船皆為鈎距所破銳與郡官張
文錦林有祿嬰城固守濠至城下銳令軍士大罵之宸
濠怒悉力攻城不克乃令潘僉事家人持書諭降銳手
斬以徇賊氣遂衰又安南叛人入寇剽掠欽廉等州諸
司議募陸兵俞大猷曰賊由海來當以海舟破之若專
備於陸賊舍此擊彼我不勝其備賊不勝其擊彼逸我
勞非計也乃多集海舟遂破之於永安萬寧安南亟賊

首以降

欽定續通典卷九十九

欽定四庫全書

欽定續通典卷一百

兵

以逸待勞

五代唐莊宗侵梁趨汴州宿胡柳坡遇梁軍問戰於周德威德威曰此去汴州信宿而近梁軍父母妻子皆在其中軍必力爭吾以深入之兵當必死之戰可以計勝難以力圖且吾先至此糧爨具營柵完以逸待勞王宜

按軍無動臣請以騎軍擾之使其營柵不成樵爨不暇給因其勞而乘之可以勝也不聽卒敗

金元帥完顏默音征鄂斡以兵甲士萬三千人分為左右翼至木虎崖盡委輜重齎數日糧輕騎襲之時鄂斡自秦州走齊州有吏紇者來降謂默音曰賊中馬肥健官軍馬疲弱此去賊八十里比遇賊馬已憊賊輜重去此不遠我攻之賊必救其巢穴賊至馬必疲我馬少得息所謂以逸待勞者也默音從之鄂斡果敗

明傳友德既敗韓乙度敵尚強且復至乃開城門陣於野使皆卧槍以待聞鼓即起賊李二果盛兵至輕我寡競而囂友德鼓之士騰躍搏賊遂縛李二以獻又都督劉江鎮遼遼島東南有火光度倭且至犒師秣馬略不為意設伏燒賊船截其歸路約曰旗舉炮鳴伏盡起奮擊倭果翌日登岸江舉旗鳴鼓伏兵兩翼進搏賊大敗諸將問臨敵意思安閒惟飽士馬何也江曰窮寇遠來必飢且勞我以逸待勞以飽待飢兵法也又倭寇陷泉

州朝廷責戰益急俞大猷疏曰賊尚萬人入死地能戰
若迫城而攻彼實我虛彼逸我勞彼飽我飢一挫而東
南事壞矣不若列營以困之彼欲攻柵以遁我實彼虛
我逸彼勞我飽彼飢而我得犄角以取之敵以戰為守
我以守為攻於是星布兵營畫地鑿溝令東西通而列
柵其上賊挑戰不動已竟殲賊

師不襲遠

五代漢隱帝時李守貞趙思綰王景崇反遣樞密使郭

威率禁兵將白文珂等督攻之諸將皆請先擊思綰景崇威計未知所向行至華州節度使扈彥珂謂威曰三叛連衡以守貞為主守貞先敗則思綰景崇可傳聲而破矣若捨近圖遠使守貞出兵於後思綰景崇拒戰於前則漢兵屈矣威以為然遂先擊守貞

明郭英從傳友德征雲南兵由永寧路多險阻諸將欲深入郭英曰破敵貴先聲攻取必自近始舍近趨遠非策之上也遂以兵攻赤水河路時久雨水暴漲英斬木

造筏乘夜濟河比曉敵大驚潰生擒烏撒并阿容等攻
克曲靖陸涼越州闕索嶺椅子寨

餌敵取勝

唐高開道為蔚州總管幽州饑羅藝求賑開道許之藝
遣老弱就食皆厚遇之藝悅不為虞更發兵三千車數
百馬數千往請粟開道悉留不遣又曲環鎮陳許軍劉
昌裔為營田副使環卒上官浣知留後會吳少誠引兵
薄城有兵馬使安國寧謀以城應賊事洩昌裔密計斬

之即召其麾下千餘人人賞縑二疋伏兵要諸巷令持
縑者悉斬之無一人得脫賊聞解去又楊行密為將值
畢師鐸鄭漢章將兵萬餘人猝至衆驚懼行密安卧帳
中曰賊近告我遂積金帛糧米於一寨使老弱守之伏
精兵於傍師鐸等至密自將千人衝其陣陽敗走師鐸
兵追之入寨大掠伏發盡殲之

遼景宗乾亨初宋下河東乘勝襲燕北院大王耶律希
達與蕭托郭逆戰敗績退屯清河北耶律色珍取希達

等青幟軍於得勝口以誘敵敵果爭赴色珍出其後奮

擊敗之

以敗軍誘敵亦同餌敵之義

元察罕特穆爾謀復汴梁令弱卒立柵外城以餌賊賊出爭之弱卒佯走至城西因突鐵騎縱擊悉擒其衆賊不敢出

明時海賊徐海麻葉犯杭胡宗憲馳至嘉興賊來薄城外宗憲取酒百餘罍投以毒載之兩舟選卒慧而猛者假冠服坐舟中佯作餉軍狀載向賊所從道見賊即委

舟走賊信不疑爭取酒飲之多死

受敵餌取敗附

唐王佖為靈鹽節度使先是吐蕃欲成烏蘭橋每於河孺
先貯材木朔方府每遣人潛載之委於急流終莫能成
蕃人知佖貪而無謀先厚遺之然後并役成橋仍築月
城圍守之自是朔方禦寇不暇由佖黷貨邊上以貽患
焉

臣等謹案餌敵可以取勝受敵餌即可以取敗兵

家炯鑒事實相因杜典無此目謹附於此

軍勝據掠被追襲多敗

唐李晟與李懷光同討朱泚懷光軍輒據掠驅牛馬百姓苦之晟軍無所侵犯收復京城告諭於衆百姓安堵如故

明傅友德守彭城王保保遣將李二來攻勢甚張友德度多寡不敵訶其衆方肆掠率步騎自呂梁渡直趨擊之單騎奮槊刺其驍將韓乙師乘而進敵大敗

抽軍

五代梁將劉鄩拒晉以晉兵盡在魏州晉陽必虛欲以奇計取之乃潛引兵自黃澤關西去晉人怪鄩軍數日不出寂無聲迹遣騎覘之無斥候者城中亦無烟火但烏止於壘上時見旗幟循堞往來晉王曰我聞劉鄩用兵一步百計必詐也更使覘之乃縛旗於芻偶之上使驢負之循堞而行得城中羸老者語之云軍已去二日矣既而有人自鄩至者言鄩兵已趨黃澤晉王始發騎

追之又黃文靖佐葛從周入潞會晉軍十餘萬俯外垣砦文靖慮孤軍難守乃與從周啓闔出師文靖為殿後命矢刃皆外向持重而還晉人不敢逼

宋攻金宿州失利將班師諸軍發靈壁畢再遇獨留未動度軍行三十餘里乃火靈壁諸將問夜不火火今日何也再遇曰夜則照見虛實晝則烟埃莫覩彼已敗不敢迫諸軍乃可安行無虞汝等安知兵易進而難退耶遂還泗州

乘敵抽軍襲破之附

唐武宗時鎮州奏事官高迪密陳事宜其一以為賊中
好為偷兵術潛抽諸處兵聚於一處官軍多就追逐以
致失利官軍須知此情自非來攻慎勿與戰彼淹留不
過三日須散歸舊屯如此數四空歸自然喪氣官軍密
遣諜者詢知其抽兵之處乘虛襲之無不捷矣

臣等謹案抽軍之法所以防追襲也若預知敵情
則乘虛更足以取勝謹增附此目益以見抽軍之

宜慎云

甲辭怠敵取之

五代初青州王師範遣將盧洪攻棣州張蟾洪以兵返襲青州師範陽為好辭遣人迎語洪曰吾幼未能任事賴諸將共持之耳不然聽公所為也洪以師範無能為遽還不為備師範伏兵於道語其僕劉鄴曰洪來為我斬之明日洪至師範出迎鄴於坐上斬之伏兵發盡殺其餘兵又晉王李克用因劉守光使人諷鎮定尊己為

尚父怒欲伐之諸將皆曰是為惡極矣不若陽為推尊以稔之乃與六節度共奉冊往守光益驕卒為晉所滅稱降及和因懈敗之

唐初王君廓聚眾掠夏長平河東丞丁榮拒之且遣使慰召君廓見使謬欲歸首者榮輕之因陳兵登山君廓悉伏兵山谷中榮軍還掩擊破之又李光弼守太原史思明引兵十萬攻之光弼遣人詐為約降而穿地道周賊營中至期遣裨將將數千人出如降狀賊皆屬目俄

而營中地陷死者千餘人賊衆驚亂官軍鼓譟乘之俘斬萬計又思明至偃師光弼悉軍趨河陽身以五百騎殿已入城衆二萬軍纔十日糧賊頓白馬祠治塹溝築月城以守光弼謂李抱玉曰將軍能為我守南城二日乎抱玉曰過期若何曰棄之抱玉許諾即給賊曰吾糧盡明日當降賊喜斂兵待期抱玉已繕完即請戰賊忿欺急攻之抱玉出奇兵夾擊賊帥周摯引却

五代梁將朱珍攻朱裕於鄆州珍去鄆二十里遣精兵

挑之鄆人不出裕詐為降書陰使人召珍約開門為內
應珍信之夜率兵叩城裕登陴開門納珍軍已入甕城
而垂門發鄆人從城上礮石以投之珍兵皆死珍僅以
身免

金李師夔遇賊張勝以萬人攻奉聖州城師夔度衆寡
不敵乃偽與之和日致饋給勝信之師夔乘其不備使
人刺勝殺之以其首徇曰汝輩皆良民脅從至此今元
惡已誅可棄兵歸復其所賊衆大驚皆散去

兩軍相對取背破之

唐初吐谷渾寇邊詔李靖及江夏王道宗討之賊聞兵至走嶂山數千里諸將議息兵道宗固請討李靖然之乃遂帥偏師無行倍道去大軍十日追及之賊據險苦戰道宗潛遣千餘騎踰山襲其後賊表裏受敵遂奔潰又至德中賊安慶緒遣嚴莊助張通儒拒官軍於陝李嗣業從郭子儀討賊遇於新店先是回紇傍南山設伏按軍北崦以待官軍與賊力戰數合我師初勝而後敗嗣

業逐急應接回紇從南山望見官軍敗曳白旗而下徑
抵賊背穿賊陣過賊陣西北角先陷嗣業又率精騎前
擊表裏齊進賊衆大敗走河北又僕固懷恩領朔方行
營節度會回紇請和助討史朝義即引兵屯陝州時諸
節度兵齊進次黃水賊堅壁自固懷恩陣西原多張旗
旛使突騎與回紇稍南出繚賊後舉旗為應破賊壁死
者數萬

宋曹瑋知秦州嘉勒斯賚入寇瑋迎戰二都谷賊雖衆

然器甲殊少在後者皆持白楮毛連瑋知不足畏欲以
氣凌之引百騎穿賊陣出其後升高指揮軍中鼓譟夾
擊斬首三千明日視林薄間中傷及投崖死者萬計又
張俊討李成賊驍將以衆十萬來援夾河而營楊存中
謂俊曰彼衆我寡擊當用奇願以騎見屬公以步卒居
前俊從之存中夜銜枚渡河出西山馳下擊賊背俊以
步兵夾攻俘八千人

遼耶律色珍為山西路兵馬都統宋將楊繼業陷山西

諸郡色珍至定安遇賀令圖軍擊破之明日至蔚州敵不敢出色珍書帛射城上諭以招慰意陰聞宋軍來救令都監耶律達薩夜伏兵險阨俟敵至而發城守者見救至突出色珍擊其背二軍俱潰追至飛狐遂取蔚州金富察貞敗宋將程松於和尚原進兵至小關松將楊廷據險注射貞不得前令行軍副統費摩阿里為疑兵潛遣明安胡信率甲士五千人繞出其後反擊之宋兵大亂遂斬廷於陣宋兵走二里關又興定初宋人圍海

州完顏仲元軍高橋令提控完顏阿林領騎遠出其後
夾擊之宋兵解去

元史天澤圍武仙於衛州金將完顏哈達以衆十萬來
援戰不利諸將皆北天澤獨以千人繞出其後敗一都
尉軍遂與大軍合攻之仙逸去遂復衛州又至正末賊
陷大寧伊蘇討之兵次侯家店與賊戰自昏抵曙散而
復合伊蘇遣別騎繞出城後賊腹背受敵大敗之

明鄧愈從太祖渡江克采石取太平元將陳額森合哈

雅兵來戰甫合愈與徐達率奇兵繞出其後大破之獲
額森哈雅走遂下建康又徐達與常遇春討張士誠敵
大潰薄其城士誠弟士信來援遇春率奇兵入大全港
營於東阡却壓其背士信急抽精兵搏戰遇春鼓將士
立破之又徐達鎮池州陳友諒來犯太祖命常遇春助
之令達設伏九華山下急掩其後友諒至盡銳攻城城
中伐鼓大譟伏盡發內外夾攻遇春率萬人自山下擊
斬首萬計又沐英攻雲南大理城大理倚點蒼山二關

為固英乃令王弼由泅水趨上關自以兵綴下關別遣胡海從間道夜渡河繞出點蒼山後緣岸而上立我軍旗幟英士卒望見皆踴躍大呼敵衆驚擾英遂斬關入海亦麾山上軍馳下前後夾攻敵悉潰走又成祖因盛庸軍夾河為營遂帥師東向下令曰吾觀敵陳每以精銳在前罷弱在後今當以勁師前摧其精銳中軍去敵五六里嚴陳以待俟我以精騎繞出敵背擊之使前奔中軍乘其氣乏擊之我躡其後乘勢逐北必敗慎勿逆

擊彼敗不得前奔則盡力死鬪矣

兩軍相對繼遣軍助即勝

唐高祖初率兵擊羣盜至龍門縣有賊毋端兒衆數千人掩至城下時諸軍無備為賊所乘高祖親率百餘騎橫出助擊之所射應弦而倒賊大潰逐北數十里又羅士信取千金堡太宗令屈突通守之王世充自來攻堡通懼舉峰請救太宗度通力堪自守且緩救以驕世充通舉三峰已急太宗方出援之左右未獲從以兩騎進遇

賊將葛彥璋射之擒之於陣後軍亦繼至通軍復振表裏奮擊世充大敗

五代晉王李存勗救趙與梁軍相拒鄆邑鎮定兵扼河橋梁兵急擊之存勗望見鎮定兵將敗顧王建及曰橋為梁奪則吾軍危矣建及選騎馳擊梁兵梁兵敗解去宋趙葵既破金兵於蘄州復分軍為二陣趙范將左扈再興將右葵左右策應敵亦背山分為二以相當而不先動范曰金人必謀夜戰以倖勝乃預備大鼓令士卒

聞鼓聲始動未幾金果進兵范疊鼓麾軍突關蔡繼之
獲其輜重山積

金世宗大定二年宋以萬人據壽安縣嵩州刺史舒穆
魯圖喇押軍萬戶圖克坦薩布以騎兵三百巡邏遇於
縣東請師於富察沃稜沃稜使明安完顏呼沙呼率七
百人助之宋兵多圖喇使士卒下馬跪而射之宋兵不
能當走入縣城圖喇進逼之宋人棄城去追及於鐵索
口復大敗遂復壽安

元季文龍章焱等叛據處州趙賁亨帥衆圍之斬首三級焱復合衆二萬來攻陣惡溪南賁亨分兵拒守自將精銳亂流衝擊屬萬戶呼都克台以援兵繼至擊之自巳至亥賊乃退文龍溺死

明初陳友諒陷太平進逼龍灣太祖與戰於石灰山未決馮勝率宿衛士直擣其中堅遂大破之

兵多力有餘宜分軍相繼

唐李盡忠叛詔王孝傑統兵十八萬討之孝傑軍至東

峽石谷遇賊道險兵甚衆孝傑率精銳之士為先鋒且戰且行及出谷布方陣以扞賊後軍總管蘇宏暉畏賊衆棄甲而遁孝傑既無後繼為賊所乘營中潰亂孝傑墮谷而死兵士被殺殆盡

五代晉高祖時安重榮反杜重威逆戰於宗城重榮為偃月陣重威擊之不動重威欲少却以伺之偏將王重允曰兩兵方交退者先敗乃分兵為三重威先以左右隊擊其兩翼戰酣重允以精兵擊其中軍重榮將趙彥

之來奔重榮遂大敗走還鎮州閉壁不敢出重威率衆
攻破之

遼太宗會同八年分兵攻晉邢洺磁三州入鄴都境張
從恩馬全節安審琦兵悉陣於相州安陽水之南皇甫
遇與濮州刺史慕容超將兵千騎來覘遼軍至鄴都遇
遼軍數萬且戰且却至榆林店遼軍繼至遇與彥超力
戰百餘合遇馬斃步戰審琦引騎兵踰水以救遼軍乃
還

金宗翰駐軍北安與都統杲議伐遼杲軍出青嶺宗翰
軍出瓢嶺期于羊城濼會軍宗翰以精兵六千襲遼主
開遼主自五院司來拒戰宗翰倍道兼行一宿而至遼
主遁去乃使希尹等追之西京復叛耿守忠以兵五千
來救至城東四十里富察烏爾古納先擊之斬首千餘
宗翰宗雄宗翰宗峻繼至宗翰率麾下自其中衝擊之
使餘兵去馬從旁射之守忠敗走其衆殲焉

明廖永忠與蜀將鄒興戰於夔府分軍為前後陣前陣

既接乃令後軍兩翼傍出大敗之又常遇春從攻張士誠蘇州圍久士誠欲出城突戰遂謀奔遇春營遇春覺之分兵北濠斷其後遣兵與關乃命王弼與決死戰遇春復率衆繼之士誠兵大敗走入城勢益窘

我寡敵衆自遠至乘疲敗之

五代晉楊光遠反引契丹侵陷貝州博州守周儒亦叛降竇儀言于出帝曰今不以重兵守博州渡使契丹得引北兵東過河與光遠合則河南危矣乃遣李守貞皇

甫遇以兵萬人沿河而下儒果引北兵自馬家渡濟河
方築壘守貞等急擊之契丹大敗遂與光遠隔絕契丹
主聞河上兵敗與晉戰于澶魏之間亦敗遂北去

宋曹瑋知鎮戎軍常出與番戰番引去瑋偵敵去已遠
乃緩驅所掠牛馬輜重而還敵聞瑋逐利行遲師又不
整遂還兵來襲將至瑋使諭之曰番軍遠來必疲我不
乘人之怠請憩士馬少選次戰敵方甚疲皆欣然解嚴
良久瑋又使諭之曰可相馳矣乃各鼓軍而進大破敵

兵因謂其下曰吾知敵已疲故為貪利以誘之比其復來幾行百里矣若乘銳以戰猶有勝負遠行之人小憩則足痺不能立人氣亦闌吾以此取之

元雅克特穆爾聞特們德爾及額森特穆爾軍陷通州將襲京師急引軍至通州乘其初至擊之敵軍狼狽走渡潞河夾河而軍敵列植忝稽衣以氈衣然火為疑兵夜遁雅克特穆爾率師渡河追之

明傅友德伐蜀破階文蜀丞相戴壽帥兵來援時諸將

議江水漲欲駐師大溪口友德乃下令曰彼遠來勞困衆方洶洶一戰可克也遂迎擊壽兵拔漢州擒其將梁士達等俘獲甚衆又張溫守蘭州會元王保保引兵來襲溫曰彼衆我寡難與為敵但其匆卒遠來未知我虛實乘暮擊之可挫其鋒若復不退則亦可固守以待援乃整兵出戰保保兵却卒完其城

挑戰

唐郭子儀李光弼率師下井陘拔常山賊將史思明收

散卒數萬人踵其後我行亦行我止亦止子儀選驍騎
五百更挑戰三日至行唐賊疲乃退我軍乘之又敗於
沙河

五代梁遣王景仁將魏滑汴宋等兵七萬人擊趙趙王
王鎔乞師於晉莊宗自將出贊皇會周德威於石橋進
距栢鄉五里營於野河北莊宗意在速戰德威曰吾兵
少而臨賊營門所恃者一水隔耳使梁得舟楫渡河吾
無類矣不如退軍鄆邑誘敵出營擾而勞之可以策勝

也乃退軍鄆邑德威晨遣三百騎叩梁營挑戰自以勁兵三千繼之景仁怒悉其軍以出與德威轉鬪數十里至於鄆南兩軍皆陣梁軍橫亘六七里汴宋之軍居西魏滑之軍居東德威請俟其將退而擊之至未申時梁軍東偏塵起德威鼓譟而進麾其西偏曰魏滑走矣又麾其東偏曰梁軍走矣梁陣動不可復整乃皆走遂大敗自鄆追至栢鄉景仁以十餘騎僅免

漢隱帝遣趙暉討王景崇景崇西招蜀人為助蜀兵至

寶雞為暉將藥元福李彥從所敗暉攻鳳翔塹而圍之
數以精兵挑戰景崇不出暉乃令千人潛之城南一舍
偽為蜀兵旗幟循南山而下聲言蜀救兵至矣須臾塵
起景崇以為然乃令數千人潰圍而出以為應暉設伏
以待之景崇兵大敗

元蘇布特從睿宗經理河南道出牛頭關遇金將哈達
帥步騎數十萬待戰睿宗問以方畧蘇布特曰城居之
人不耐勞苦數挑以勞之戰乃可也師集三峯山金兵

圍之數匝會風雪大作其士卒僵仆師乘之大捷

敵處高勿攻

唐蘇定方征賀魯至曳咥河賀魯率十姓兵十萬拒戰
輕定方兵少舒左右翼包之定方令步卒據高攢稍外
向親引勁騎陣北原賊三突步陣不能入定方因其亂
擊之賊大奔

五代唐李嗣昭攻梁邢洺為梁將葛從周所敗梁兵追
之李嗣源從間道至解鞍礪鏃憑高為陣左右指揮梁

兵望之莫測嗣源急呼曰吾取葛公士卒可無動乃馳騎犯之出入奮擊嗣昭繼進梁兵解去

元董文蔚從憲宗伐宋入川蜀至釣魚山崖壁巉峭唯一徑可登敵恃險阻未即降帝命攻之文蔚以次往攻激厲士卒挾雲梯冒飛石履崎嶇以登直抵其寨苦戰頃之兵士被傷乃還

敵黨急之則合緩之則離

唐高仁厚討叛將楊師立圍梓州久不下乃為書射城

中遺將士曰仁厚不忍城中玉石俱焚為諸君緩師十日使諸君自成其功若十日不送師立首當分見兵為五番番分晝夜以攻之於此甚逸於彼必困矣五日不下四面俱進克之必矣諸君圖之數日賊黨鄭君雄大呼於衆曰天子所誅者元惡耳他人無預也大譟突入府中師立自殺

五代初楊行密遣劉存攻鄂州焚其城城中兵突圍而出諸將請急擊之存曰擊之復入則城愈固聽其去城

金方口入
卷一百
可取也是日城破執杜洪斬於廣陵

假託安衆

唐裴行儉奉詔冊立波斯王且為安撫大食使途經莫
賀延磧屬風沙晦暝導者迷將士飢乏行儉命止營致
祭令曰井泉非遙衆少安俄而雲收風靜行數百步水
草甚豐後來者莫識其處衆皆驚比之貳師將軍又高
仙芝討吐蕃破連雲堡留兵守之而進將至坦駒嶺直
下峭峻四十餘里仙芝恐兵士憚險不下乃潛遣二十

騎詐作阿弩越衣服上嶺來迎既至坦駒嶺兵士果不肯下曰公驅我何去言未畢仙芝所使二十人來云阿弩越並好心奉迎仙芝佯喜令兵士盡下下嶺三日阿弩越果來迎

宋狄青征儂智高兵出桂林之南道傍有廟人謂其神甚靈青遽為駐節禱之因祝曰勝負無以為據乃取百錢自持之且與神約果大捷則投此期盡錢面也萬衆方聳視已揮手一擲則百錢盡紅矣於是舉軍歡呼青

大喜顧左右取百釘來即隨錢疎密布地而釘帖之加
以青紗籠復手自封焉曰俟凱旋當謝神取錢其後破
崑崙關敗智高師還如言取錢與幕府士大夫共視之
乃兩面錢也

金和羅附布鼎布鼎誘烏春兵為亂世祖與遇蘇素海
甸世祖曰予昔有異夢今不可親戰若左軍中有力戰
者則大功成矣命肅宗及實喇蘇卜實與之戰大敗之
欽定續通典卷一百

欽定四庫全書

史部

欽定續通典卷一百一

詳校官監察御史臣曹錫寶

洗馬臣王坦修覆勘

校對官編修臣汪鏞

謄錄監生臣周元芬

欽定四庫全書

欽定續通典卷一百一

兵

行軍下營審擇其地

唐太宗討高麗營州都督張儉畏不敢深入李道宗請以百騎往曰臣請二十日行留十日覽觀山川得還見天子因傍南山入賊地相易險度營陣便處將還會高麗兵斷路更走間道謁帝如期

五代時謝彥章為梁騎將與賀瓌行視郊外瓌指一地語彥章曰此地岡阜隆起其中坦然營柵之地也已而晉兵柵之瓌疑彥章陰以告晉益惡之

宋宗澤於京城四壁各置使以領招集之兵又據形勢立堅壁二十四所於城外沿河鱗次為珠砦以聯結兩河諸路人馬又吳璘按行諸屯預治黃河戰地先以數百騎嘗敵敵鳴鼓銳士自空壁出突璘軍璘軍先得治地無不一當十敵大敗遁入壁又詔孟珙收復荊襄珙

謂必得郢然後可以通饋餉得荆門然後可以出奇兵
於是歸州屯三千人鼎澧辰沅靖各屯五千人柳桂各
千人以保江西

元薩奇蘇布哈追金主至歸德欲薄城背水而營史天
澤曰此豈駐兵之地乎彼若來犯則進退失據矣不聽
果全軍覆沒又達實巴圖爾攻襄陽相視形勢內列八
翼包絡襄城外置八營軍峴山楚山以截其援自以中
軍四千據虎頭山以瞰城中

金史卷一百一
鄉導

唐代宗時吐蕃與諸雜羌戎寇陷西山柘靜等州詔嚴武收復武遣崔旰統兵西山賊城周圍皆石礫攻具無所設惟東南隅環丈之地壤土可穴謀知之以告旰晝夜穿地道以攻之再宿而拔其城因拓地數百里下城寨數四番衆相語曰崔旰神兵也將更前進以糧盡還五代初梁以葛從周為兗州刺史將兵在外時劉鄩為王師範守登州使入貢油鬻兗城中悉視城中虛實出

入之所油者得羅城下水竇可入鄴以步兵五百從水竇襲破之

宋郭逵知澧州得北溪蠻親信厚待之用以為鄉導盡平諸隘遂破其所居桃花州蠻彭仕義棄城走衆悉降又种世衡守青澗有僧王光信者習知番部山川道路世衡出兵嘗使為鄉導數有功又韓世忠破方臘窮追至睦州青溪峒賊深據岩屋為三窟諸將繼至莫知所入世忠潛行溪谷問野婦得逕即挺身仗戈直前度險

數里擣其穴格殺數十人擒臘以出又孟珙討唐鄧行
省武仙仙愛將劉儀降珙問仙虛實儀陳仙所據九砦
石穴山以馬蹬沙窩岵山三砦蔽其前三砦不破石穴
未易圖也若先破離金砦則王子山砦亦破岵山沙窩
孤立三帥成擒矣珙翼日遣兵向離金執黑旗入砦分
據巷道縱火掩殺是夜壯士楊青擣王子山砦入帳斬
其帥首一時諸砦俱破

金太宗天會間伊喇成隸達賚下為行軍明安與宋人

戰於楚泗之間成以所部先登大破宋軍劉麟約會天
長軍議進止成與瓜爾佳察罕鼎俱為達賚前鋒得宋
生口為鄉導遂達天長睿宗嘉之又宋蔡靖遣郭藥師
帥師與金人戰於白河兵敗而還藥師遂帥所部兵劫
靖及轉運使呂頤浩以降幹里雅布既得藥師益知宋
虛實因以為鄉導懸軍深入矣

元太祖距居庸關百里召徹伯爾問計對曰從此而北
黑樹林中有間道騎行可一人臣向嘗過之若勒兵衝

救以出終夕可至太祖乃令徹伯爾輕騎前導日暮入
谷黎明諸軍已在平地疾趨南口金鼓之聲若自天下
又襄陽軍乏食劉斌知青陵多積穀前阻大澤水深不
可涉陳可取狀衆難之斌叱曰彼恃險不我虞取可必
也帥騎兵百人夜發所獲敵人使道之前行汙澤中五
十餘里遇敵斌捨馬揮槩突敵敗之得糧數千斛又張
宏範破宋廣州由潮陽港發船入海至甲子門獲宋斥
堠劉清顧凱乃知宋廣王所在遂次崖山

明徐達分布士馬規取河北克臨清獲李寶臣等用為嚮導又檄諸將率馬步舟師夾河進元伊蘇帥衆禦海口望風大潰又王守仁既諭降土番盧蘇王受即因其兵攻斷藤峽其中諸徭上連八寨下通仙臺花相諸峒連絡數十餘巢盤亘三百里守仁使盧蘇等為鄉導以土兵分道深入大破之又王守仁攻橫水左溪賊至賊巢三十里駐兵夜募鄉兵善登山者四百人各執旗懷銃砲由間道入險分布近巢左右極高山頂伏覘賊度

我兵至險舉砲應之又先遣壯士緣崖奪險盡獲其滾木壘石亡何守仁進攻賊正據險迎敵忽聞近巢砲聲烟焰蔽天起乃急麾兵逼之賊大驚潰遂乘勝破之又林俊巡撫四川值賊首藍廷瑞廖惠等攻破諸郡邑俊以官兵不諳地勢乃召各處土兵協力勦之殺溺死者六千餘人廖惠被擒廷瑞奔投鄆本恕越陝西漢中三十六盤至大巴山俊復遣兵追及敗之擒廷瑞本恕漢冠以寧

下營斥堠并防捍及分布陣

五代梁謝彥章為葛從周養子從周授之兵法以千錢置大盤中為行陣偏伍之狀示以出入進退之節彥章盡得之後為將居軍中常儒服或臨敵御衆肅然有將帥之威左右馳驟疾若風雨晉人望其行陣齊整相謂曰謝彥章必在此也

宋真宗景德初契丹寇河朔車駕親征大將李繼隆為駕前排陣使赴澶州陳兵北城澶淵城壁不足守無敵

柵戰格之具繼隆計度州之三面距大河毀車為營先命士卒掘重濠塹埋鹿角數十里以大軍數千乘重疊環之步騎處其中敵數萬來犯急攻其營禦之遁去又神宗熙寧七年十月帝以新安結隊法并賞罰格及置陣形勢等遣近侍李憲付鄜延帥趙鼎俾講求推及諸路於是高奏曰伏詳置陣之法以結隊為先今聖制雖與古同而用法尤為精密此蓋陛下天錫勇智不待學而後能也然而議者云四十五人而一長不若五人而

一長之密夫有五人而一長即五十人而十長也推之於百千萬則為長多而統制不一也至如周制五人為伍屬之比長五伍為兩屬之閭胥四兩為卒屬之族師五卒為旅屬之黨正五旅為帥屬之州長五帥為軍屬之命卿此猶今之軍制百人為都五都為營五營為軍十軍為廂四廂都指揮而下各有節級有員品亦昔之比長閭胥族師黨正之任也况八陣之法久失其傳聖制煥然一新稽之前聞若合符節蓋法制一定易以致

人臣有所見不敢不聞又八年帝諭近臣曰黃帝始置八陣法敗蚩尤於涿鹿諸葛亮造八陣圖於魚復平沙之上壘石為八行晉桓溫見之曰常山蛇勢此即九軍陣法也至隋韓擒虎深明其法以授其甥李靖靖以時遭久亂將帥通曉者頗多故造六化以變九軍之法使世人不能曉之大抵八陣即九軍九軍者方陣也六花陣即七軍七軍者圓陣也蓋陣以圓為體方陣者內圓而外方圓陣則內外俱圓矣故以方圓物驗之則方以

八包一圓以六包一此九軍六花陣之大體也六軍者
左右虞候軍各一為二虞候軍左右廂各二為四廂軍
與中軍共為七軍八陣者加前後二軍共為九軍開國
以來置殿前馬步軍三帥即中軍前後軍帥之別名而
馬步軍都虞候是為二虞候軍天武捧日龍神衛四廂
是為四廂軍也中軍帥總制九軍即殿前都虞候專總
中軍之事務是其名實與古九軍及六花陣相符而不
少差也今論兵者俱以唐李筌太白陰經中陣圖為法

失之遠矣今可約李靖法為九軍營陣之制然李荃之圖乃營法非陣也朕採古之法酌今之宜曰營曰陣本出於一法而已止曰營行曰陣在奇正言之則營為正陣為奇也又郭遼慷慨喜兵學神宗嘗訪八陣遺法對曰兵無常形特奇正相生之一法耳因為帝論其詳在延安使以教兵久不就遼擇諸校習金鼓屯營者六十人使人教一隊頃刻而成尤善用偏裨每至所部令人自言所能暇日閱按之故臨陣皆盡其技又岳飛隸

留守宗澤戰開德曹州皆有功澤大奇之曰爾勇智才
藝古良將不能過然好野戰非萬全計因授以陣圖飛
曰陣而後戰兵法之常運用之妙存乎一心澤是其言
又吳璘兵法云布陣之法以步軍為陣心左右翼以馬
軍距馬步兩肋之間至帖撥增損則係乎臨機耳又吳
璘疊陣法每陣以長槍居前坐不得起次最强弓次强
弩跪膝以俟次神臂弓約賊相搏至百步內則神臂先
發七十步强弓並發次陣如之凡陣以縱馬為限鐵鉤

相連俟其傷則更代之遇更代則以鼓為節騎兩翼蔽於前陣成而騎退謂之疊陣此即古來伍法也戰士心定則能持滿敵雖銳不能當也

金布薩忠義赫舍哩志寧追鄂幹於梟嶺西陷泉明日敵軍三萬騎涉水而東大軍先據南岡左翼軍自岡為陣迤邐而北步軍繼之右翼軍繼步軍北引而東作偃月陣步軍居中騎兵據其兩端使敵不見首尾是日大霧晦冥既陣霧開少頃晴霽敵見左翼據南岡不敢擊

擊右翼軍烏延察喇力戰敵稍却志寧與爪爾佳清臣
烏林阿拉薩道刺合戰敵大敗又珠嘉塔爾琿因元兵
入陝西上章曰宋人與我為讐敵頃以力屈自保非其
本心今陝西被兵河南出師轉戰連年不絕兵死於陣
民疲於役國力竭矣壽泗一帶南接盱楚紅襖賊李全
巢穴也萬一宋人謀知與全乘虛而入腹背受敵非計
之得也臣已令所部沿邊警斥以備非常宜勅壽泗帥
臣謹斥堠嚴烽燧常若敵至此兵法所謂無恃其不來

恃吾有以待之之道也帝是而行之

元阿爾哈雅曰汴在南北之交使西人得至此則江南三省之道不通於畿甸軍旅應接何日息乎夫事有緩急輕重今重莫如足兵急莫如足食吾徵湖廣之平陽保定兩翼軍與吾省之鄧新翼廬州沂郟砲弩手諸軍以備虎牢裕州哈喇婁鄧州孫萬戶兩軍以備武關荆子口以屬郡之兵及蒙古兩都萬戶左右兩衛諸部丁壯之可入軍者給馬垂貲裝立行伍以次備諸隘芍陂

等屯兵本自襄鄧都軍來田者還其軍益以民之丁壯
使守襄陽白土峽州諸隘別遣塔海以備自蜀至者以
汴汝荆襄兩淮之馬給之府庫不足則命郡縣假諸殷
富之家安豐等郡之粟遡黃河運至於陝糴諸汴汝近
郡者則運諸滎陽以達於虎牢吾與諸軍各奮忠義以
從王事宜無不濟者衆曰唯命即日部分行事又湖南
徭獠竊發朝廷命招諭之達實特穆爾謂寇情不可料
請置三分省一治靜江一治沅靖一治柳桂以左右丞

參政分兵鎮其地罷靖州路總管府改立靖州軍民安撫司設萬戶府監以戍兵又布延特穆爾既敗賊於丁家洲分遣萬戶普賢努屯陽陵王建中屯白面渡魯爾討無為州而自率鎮撫布哈萬戶明安駐池口以遏上流為之節度又元主以伊濟為淮西宣慰副使守安慶集有司議屯田守戰策環境築堡砦選精甲外捍而耕稼於中浚湟增陴外環以大防深塹三重南引江水注之環植木為柵城上四面起飛樓表裏完固俄陞都元

帥時羣盜環布四外伊濟居其中左提右挈屹為江淮
一保障又山東賊分道犯京師察罕特穆爾奉詔屯兵
涿州即留兵戍清湫義谷屯潼關塞南山口以備他盜
而自將銳卒赴召又察罕特穆爾定河南以兵分鎮關
陝荆襄河洛江淮而重兵太行營壘旌旗相望數千里
日修車船繕兵甲務農積穀訓練士卒謀大舉以復山
東

明徐達遣指揮華雲龍經理故都城垣右丞薛顯參政

傳友德平章曹良臣都督顧時率驍騎偵邏隘口楊鎮撫以舟師鎮直沽太祖稱大將軍有體者以此達數出邊鎮北平北人畏達威名不敢復犯邊達但戒守者繕城戍簡士馬謹烽堠毋得邀功啟釁十餘歲兵民熙熙有太平色又成祖行營不為塹壘但分布隊伍列陣為門敵不敢犯故將士至營即得休息自便暇則射獵周覽地勢得禽輒頒人樂為用南軍所至掘塹作壘為營通夕不得休既成復行虛敝人力故臨戰輒先疲困又

都指揮使安敬為偏將黷而怯都督蔣貴都御史曹翼
追敵魚兒海而安敬詭辭阻軍翼言狀帝密勅王驥行
邊會諸將方就坐忽揖敬下曰汝奈何逗撓誤大計命
斬敬謂貴曰公亦當死且責狀以報諸將股栗驥分兵
畫地自莊浪西南抵黃河東北抵寧夏屬都督李安自
涼州北抵鎮番南抵古浪東南抵板井屬都督趙安自
甘州東過山丹抵永昌北抵臙脂堡西抵深溝壘屬任
禮自肅州東接深溝稍東北抵鎮夷西抵嘉峪北抵天

倉屬蔣貴約以小至則各守大至則并力拒敵由是軍
伍整肅敵騎遠避又余子俊經理榆林東起清水營之
紫城砦西至寧夏花馬池延袤二千里每二三里則為
敵臺崖砦連比不絕又於中空地築短牆橫一斜二如
蔽月形以為偵敵避箭之所凡為堡十二崖砦八百餘
墩九十有五自是要害既據內地益安榆林遂為雄鎮
又余子俊總督宣大建議以萬人為一軍用戰車五百
餘輛行則縱以為陣止則橫以為營車空缺處用鹿角

柝補塞內藏戰士糧草器械與賊對壘賊用弓矢不過百步我用槍炮可及三四百步賊散掠則出兵防遏日暮則擊其情歸前項車營尤便策應又楊一清撫靈川時有笑其演營習陣者一清曰古人行必謹哨探止必修戰備無事常如有事時隄防有事常如無事時鎮靜武侯李靖均未嘗廢營陣苟世無武穆豈可恃野戰為能哉又俞大猷從李良欽學擊劍盡其術益悟常山蛇勢以為兵法數起五猶一身五體雖將百萬之師可使

合為一人也

臣等謹案古者伍法數家大畧小列之為五人大列之二十五人參列之七十五人五其數得三百七十五人三百為正六十人為奇後世多因襲直五人為伍十五為隊大將握奇之數皆以中軍內丁代之然則伍隊雖歷世而未改也楊儀從容結陣馬昊分隊立長戚繼光偏伍什兩總是一法王驥畫界分疆不過因地而推用之耳

先據要地及水草

唐史敬奉形甚短小若不能勝衣至於野外馳逐能擒奔馬自執鞍勒隨鞍躍上然後羈帶矛矢在手前無強敵僅使僅二百人每以自隨臨入敵輒分其隊為四五隨逐水草每數日各相遇已而皆有獲又張仁愿以朔方軍隣於突厥時默啜悉衆擊突厥仁愿請乘虛奪取漠南地就河北築三受降城首尾相應以絕南寇之路自是突厥不敢踰山畋牧歲減鎮兵數萬人省費億計

又史思明之亂王師敗績乘勝而西李光弼整衆至洛謂留守韋陟曰賊乘鄴下之勝再犯王畿宜按甲以挫其鋒不利速戰洛城非禦備之所公計若何陟曰加兵陝川退守潼關據險以待之足挫其銳矣光弼曰兩軍相敵貴進尺寸之間今委五百里而不顧是張賊勢也若移軍河陽北阻澤潞三城以抗勝即擒之敗則自守表裏相應使賊不敢西侵則猿臂勢也遂移牒留守及河南尹縱居人出城避寇率軍士運油鐵諸物以為戰

守之備未一夜入河陽三城排門守備賊憚光弼威畧
頓兵白馬寺南不出百里不敢犯關又劉昌為涇原營
田使受詔築城平涼以扼彈箏峽口昌命從事旬餘而
畢又於平涼西別築崕谷堡名曰彰信平涼當四會之
衝居北地之要分兵援戍遏其要衝築神威軍於青海
中龍駒島名神龍城吐蕃屏跡不敢近青海又德宗貞
元中楊朝晟奏方渠合道木波皆吐蕃要路請城其地
以備之又奏前築鹽州凡興師七萬諸軍蕃戎盡知之

今臣境臨邊若大興兵即戎者來寇寇則戰戰則無暇
城矣今請發軍士不十日至塞下未三旬而工畢番人
始知已無奈何帝從之已事軍還吐番始來數日退又
李德裕訪破敵之策於高文端對曰官軍攻潞州澤州
兵約萬五千人賊常分兵大半伏山谷俟官軍攻城疲
倦則出掠之官軍必失利請令軍築城遶澤州以遏救
兵固鎮寨峻不可攻然寨中無水倘以兵絕水道賊必
遁去德裕以其言告諸將果如所策

宋潘美知幽州命兼三交都部署以扞北邊三交西北三百里地曰固軍形勢險阻為北邊咽喉美潛師擊之遂據其地屯兵積粟以守之自是北方以寧又耿全斌從征太原還遇敵於蒲陰追擊至徐河因據水口要害遷補騎副兵馬使又改雲騎軍使屯瀛州與敵戰所乘馬兩中流矢死凡三易乘戰不却敵為引去又仁宗寶元初趙元昊反狄青為延州指使青既破金湯城畧宥州屠羅密翠香摩諾爾桑羅沁七家口等族燔積聚數

萬收其帳二千三百又城橋子谷築招安豐林新砦大
郎等堡皆扼賊要害又范仲淹以慶州西北馬舖砦當
後橋川口在賊腹中欲城之度賊必爭密遣其子純祐
與番將趙明先據其地引兵隨之諸將莫知所向行至
柔遠版築皆具旬日城成即大順城也環慶自此寇盜
益少又种世衡為鄜州判官西邊用兵守備不足世衡
建議創青澗城以遏寇衝朝廷從之夏人屢來爭世衡
且戰且築城成復開營田二千頃出官錢以募商賈使

通其利城中芻糧錢幣軍需城守之具皆不須外計又
劉子羽以潭毒山形斗拔其上寬平有水為築壘方城
金人已至子羽據胡牀坐於壘口諸將泣告請他徙子
羽曰子羽今日死於此既而敵疑其誘已遂不敢逼又
金歸宋河南陝西地宋詔吳璘帥秦鳳移川口諸軍於
陝璘謂胡世將曰金大兵屯河中府止隔大慶一橋耳
騎兵疾馳不五日至川口吾軍遠在陝西緩急不可遽
集關隘不葺糧道斷絕此存亡之秋也因抗奏方今大

計宜固和好內修守禦所當分兵陝蜀接近仙人關未可遽廢魚關倉亦宜積糧從之

遼耶律休格敗宋兵於望都時宋將劉廷讓以數萬騎並海而出約與李敬源合兵聲言取燕休格聞之先以兵扼其地會太后軍至接戰殺敬源廷讓走瀛州

金圖克坦喀齊喀遣統軍都監紐赫以兵七千會完顏璋於德順與宋將吳玠戰玠遣兵據東山堡欲樹柵璋與實訥呼紐赫議曰敵若據東山堡此城亦不可拔宜

急擊之於是璋先據要地實訥呼以兵逼東山堡璘兵恃濠相拒短兵相接璘兵退走實訥呼追擊之又世宗大定時伐宋趨滁州將至清流關得宋偵者知敵欲三道夜出掩我不備左副元帥赫舍哩志寧問計於襄襄曰今兵少地隘儻不得關敵至我無所據必先取之曰我與若孰往襄曰元帥國家大臣詎宜輕動襄當為公往取志寧遣之襄率騎二千分二道一由衝路自以千兵間道潛登既近敵始覺襄攻克之據其關志寧履行

戰地顧謂曰克敵於不可勝之地真天下英傑也又世宗詔布薩忠義以丞相總戎事居南京節制諸將忠義至南京簡閱士卒分屯要害戒諸將嚴守備是時已復泗壽鄧州請隲其城遷其民於宿亳蔡州帝曰三州本吾土也得之則已忠義使將士擇善水草休息且牧馬俟來歲取淮南初世宗詔諸將由泗壽唐鄧三道進發宋人聞之即自方城葉縣以來田野皆燒夷之使無所芻牧忠義命唐鄧道軍芻牧許汝間

元人議攻襄陽遣史天澤呼喇珠往經畫之至則相要害立城堡以絕聲援為必取之計十年與平章阿珠等進攻樊城拔之襄陽降又阿珠還渡江議兵所向或欲先取蘄黃阿珠曰若赴下流退無所據先取鄂漢雖遲旬日可為萬全計巴延從之又元師伐宋屢捷巴延與諸將會鄂城下議曰鄂襟山帶江江南之要區也兵糧皆備不以一大將撫之上流一動則鄂非我有也乃以兵四萬遣阿爾哈雅戍鄂而與阿珠將大兵以東

明楊一清總制三邊以寧夏花馬池東至延綏安邊營西至寧夏黃河邊橫城堡地方綿亘四百餘里河套數由內侵乃請修濬牆壁以固邊防增設衛所以壯邊兵又馬昊討彞部賊高珙普法慧擣破之獨青山寨不下昊周行視寨曰此地固高絕其水道可下也乃遣兵據泉口撤南方圍待之兩日賊渴覘南圍薄夜走追遁萬人執普法慧誅之又馬昊撫蜀時蜀賊廖麻子死餘黨竄東鄉山推喻老人為帥昊請於彭澤曰山險不便騎

射深入賊為主或反失便願發步兵五萬據出入要道
賊當自餓死也澤從之賊窘果縛老人降又播州楊應
龍叛據海龍囤李化龍集兵分川貴湖廣八路討之攻
拔山峒關若據三圓山賊樵汲路絕復破海門龍鳳諸
關賊遁固上而守鐵鑄關會霖雨白日晦冥急攻破之
賊窘自焚死

識水泉隔山取水越山度險附

唐德宗建中時楊朝晟築木波以捍吐蕃初軍次方渠

無水師徒囂然遽有青蛇乘高而下視其迹水隨而流
朝晟命築防環之遂為淳泉軍人仰飲以足圖其事上
聞詔置祠焉

宋曹翰從征太原軍中乏水城西十餘里谷中有娘子
廟翰往禱之穿渠得水人馬以給又魏勝知海州築砦
以守金人急攻絕其水砦中食乾糒殺牛馬飲血勝默
禱而雨驟作又种世衡既請城故寬州然處險無泉議
不可守鑿地百有五十尺始至石工徒拱手曰是不可

井矣世衡曰過石而下將無泉耶爾其屑而出之凡一
畚償百金工復致力過石數重泉果沛發萬人歡呼曰
神乎雖敵兵重圍吾無困竭之患矣既而朝廷賜名為
青澗城

據倉廩

五代唐莊宗與劉鄩相持於魏鄩夜潛軍出黃澤關以
襲太原周德威自幽州以千騎入土門躡之鄩至樂平
遇雨不得進而還德威與鄩俱來爭趨臨清臨清有積

粟且晉軍餉道也德威先馳據之以故莊宗卒能困鄴
軍而敗之又郭崇韜伐蜀軍入大散關崇韜以馬箠指
山險謂魏王繼岌曰朝廷興師十萬已入此中儻不成功
安有歸路今岐下飛輓才及旬日必須先取鳳州收其
儲積方濟吾事乃令李嚴康延孝先馳書檄以諭偽鳳
州節度王承捷及大軍至承捷果以城降得軍儲四十
萬又下三泉得軍儲三十餘萬自是師無匱乏軍聲大
振

宋王全斌伐蜀下興州與蜀刺史藍思綰戰敗蜀軍七千人獲軍糧四十餘萬斛進攻石圖魚關白水二十餘砦敗蜀軍數萬擒招討使韓保正復獲糧三十餘萬斛進克利州得軍糧八十萬斛兵賴以濟無匱乏憂遂以破蜀

元明安岱爾善騎射從征淮安因糧於敵未嘗匱乏軍士免負擔之勞咸樂為用又蒙古台治水軍於萬山南岸大軍攻樊分軍為五道蒙古台當其一率五翼軍以

進焚南岸舟豎雲梯於北岸登櫃子城奪西南角入城
命部將據倉粟功在諸將右又元城正陽餽糧久不繼
托爾珠出兵據險潛取安豐麥以餉軍軍心以安又世
祖至元三十年廣西元帥府請募南丹五千戶屯田事
上行省哈喇哈斯曰此土著之民誠為便之內足以實
空地外足以制交趾之寇可不煩士卒而饋餉有餘即
命度地立為五屯統以屯長給牛種農具與之

明英宗陷土木于謙禦敵令九門要地都督孫鏜等分

守兵皆出營郭外毋避而示弱郭外民內徙毋令失所
而囂通倉積粟令官軍儘給草廩聽取用不盡則焚毋
以飽敵



欽定續通典卷一百一